

Date – 16/11/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. Mizoram Sorkar in kum 1 leh a chanve vel tualchhung buaina an tawh chu chingfel thuai turin Manipur sorkar leh Central Sorkar a ngen.
2. Chief Minister Pu Lalduhoma'n Bana Kaih hnuaiiah zirnaa hlawhtling lo, theihna leh thiamna kawng dang nei si te tan ruahmanna an siam tih a sawi.
3. Manipur-a dan leh thupek kenkawh kawngah security force-te, a tul anga hma la turin hriattir an ni tih Union Home Ministry-in a sawi.
4. Philippines-ah Man-Yi thlipui thawk thei vangin mi sang tam tak, hmun him lamah sawn chhuah an ni

<><><>

### GOVT PR

Kum 1 leh a chanve vel tualchhung buaina an tawh avanga harsatna tawk mek Manipur sorkar leh Central Sorkar chu buaina titawp tura theihtawp chhuaha hma la chhonzawm turin Mizoram Sorkar in a ngen.

Manipur tualchhung buaina chungchangah hian thuchhuah siamin Mizoram sorkar chuan tunhnaia buaina chhuak avanga hliam tuar leh nunna chan engemawzat an awm chu Mizoram Sorkar chuan pawl a ti a. Tun hnaia buaina avanga hliam tuar leh nunna chante leh an chhungte zawng zawng Mizoram Sorkar chuan tawrhpuoi takzet a ti a, he buaina avang hian Manipur atangin Mizoram chhungah sahimna zawngin mi engemawzat an lut a, Mizoram Sorkar leh mipui ten theihtawp chhuahin anmahni chhawmdawl hna an kalpui baw a, buaina hi a tawp theih nan hmalak thuai ni se a ti a ni.

Tunhnaia Manipur buaina kaihnawihah tumahin Mizoram chhunga hnam leh hnam inhmelmakna tichhuak thei tur zawnga hma la lo turin Mizoram Sorkar-in mitin te a ngen baw a. Mizoram chhunga hnam dang, a bik takin Manipur state a mi te himna turin Mizoram sorkar chuan hma a la zel dawn a. Chutiang bawkin Mizoram pawl cheng Mizote, a bik takin Manipur-a zirlaite leh hna thawka awm te himna turin Mizoram Sorkar chuan hma a la chhonzawm zel dawn a ni, a ti.

Hetihlai hian, Mizo Zirlai Pawl MZP chuan Manipur sorkarin an state chhunga Meitei firfiakte a khuahkhirh theih hma chu an State-a Science leh technical institution hrang hranga Mizoram seat-te chu institution dangah beh tir turin sorkar laipui an phut tih an sawi a,

MZP chuan Manipur State khawpui Imphal-a Mizoram atanga lehkha zir a awmte'n Meitei kut an tawrh loh nana hma la turin sorkar Sorkar laipui an phut tih an thuchhuahah an tarlang a ni.

Hetihlai vek hian Manipur state Jiribam-a CRPF ten an kahhlum ni a sawi, zohnahthlak mi 10 te ruang chu Silchar Medical College atangin wawin

chawhnu lam khan sorkar laipui ruahmanna in Lamka phurh thlen an ni a, vuina hun hman dan tur ruahmanna siamfel a la ni rih lo a ni.

<><><>

AGRI MINISTER

Agriculture Minister PC Vanlalruata'n Sawrkarin thlai chi 4 hralhna man a bituk aia hniama kuthnathawktuten an hralh loh nan ruahmanna siam vek tawh ani a ti.

Agriculture Minister chuan sawhthing, hmarcha, aieng leh hmunphiah man tur sawrkarin a bituk aia hniama kuthnathawktuten an hralh loh nan hma an la a ti a, theihtawp chhuah ani tih sawiin mipui hrilhhriatna pawh district tinah kalpui ani tawh a ti a, kuthnathawktuten an hriat tur pawimawh hrilhhriat zel an ni dawn a ti bawk.

Pu PC Vanlalruata chuan thlai hralhna ah sawrkar inrawlh kher a ngai lo mai thei tih sawiin kuthnathawktuten an thlai thar an hralhna turah hmalak a ni a ti a, a man bithliah aia tlawm loa an hralh ngei theih nan sawrkar chuan ruahmanna a kalpui mek tih sawiin sawrkarin a man bithliah aia toa hralhna a awm anih chuan thlai hralhnaah sawrkar inrawlh a tul dawn lo niin a sawi bawk.

Minister chuan kuthnathawktuten sawrkar rate aia tlawma thlai an hralh an remti dawnlo tih sawiin an rate aia tlawm baka hralhna a awmlo anih chuan sawrkar a inrawlh dawn a ti a, sawrkarin Minimum support price a pe dawn tih sawiin hemi atan hian sawrkarin pawisa a nei vek tawh a ti a, sawrkarin thlai a lei a ngaih thulha thlai dah khawmna tur pawh an ruahman sa a ti bawk.

<><><>

CM

Chief Minister Pu Lalduhoma'n Bana Kaih hnuaiah zirnaa hlawhtling lo, theihna leh thiamna kawng dang nei si te tan ruahmanna an siam tih a sawi.

He thu hi wawiina Govt. Gandhi Memorial High School, Champhai, kum 75 tlin lawmna lungphun a hawnna ah sawiin Chief Minister chuan zirna ah mi tin an thleng sak vek theilo a ti a, zir sanglo mi hlawhtling tam tak an awm tih sawiin sawrkar flagship program Bana Kaih hnuaiah zirnaa thlengsang lo theihna sang tak nei leh thiam thil nei tan kawng an hawnsak dawn a ti a, zirlaite chu thiam theilo annih pawhin beidawnga sual kawng zawh mai loa, hlawhtling tak ni turin kawng tinrenga taima turin a chah a ni.

Chief Minister chuan a zirchhuahna high school, Mizorama Museum hmasa ber neitu ni bawk a fang chu lawmawm atih thu sawiin Mizorama zirna in hlun bera a kal thei chu lawmawm atih thu a sawi a, GM High School chu mi hlawhtling tamtak zirchhuahna anih avangin zirlai te chu an hnungzui thei tura theihtawp chhuah turin a chah a ni.

Vawiin hun hi Headmaster Pu HT Vanlalsawma chuan a kaihruai a, School hian Chief Minister Pu Lalduhoma hi chawimawina an hlan a ni. Tun dinhmunah Govt GM High School ah hian zirlai naupang 232, zirtirtu 14 leh non teaching staff 1 an awm mek a ni.

Govt GM High School Platinum Jubilee lawmna pui ber hi karleh ni 21 leh ni 22 khian he school-a lo zir chhuak tawh Home Minister Pu K. Sapdanga hova hman a ni dawn a ni.

<><><>

MNF

Chief Minister hlui Pu Zoramathangan ZPM sawrkar tharin Airport, ZMC leh thil dang hralh a tum thawm awm chho zel chuan an mangang ve hle tih a lantir a ti.

Aizawl East MNF Block extended meeting vawiina Aizawla neih a hmanpuinaah he thu hi sawiin MNF President Pu Zoramthanga chuan Kalphungthar sawrkar chu mipui ten an hre chiang chho hle a, SASCI hna leh sum awmsa pawh, ZPM sawrkar thar chuan an ipte ah an ak tawp ringawt a ni ber a, sanction a nihna ang pawhin hmang lovin, cheng Vaibelchhe 150 SEDP leh SASCI cheng vbc 230 sum te kha, a petute a pek chhan ni lo, Sawrkar hna thawk hlawh ah te an pe ta ringawt mai a ni a, Central in hnathawhna tura a sanction tawh, an duh duh dana a pawhsawih a vangin Court emaw, Central emaw hian, a guideline anga an tih loh vangin state sum in arulh tir a nih chuan, Mizoram sum lama a hmachhawn tur chu a namai dawn lo hle a ni" a ti.

<><><>

AMFU

All Mizoram Farmers Union Siaha District bultumin, vawiin khan Kut hnathawktu te tan a vawikhat nan District Farmers' Festival chu Siaha Vaihpi District Playground ah hman a ni a, MADC Chairman Pu. N. Viakhu-an he hun hi a hmanpui.

MADC Chairman chuan thu sawiin, Khawvel a ram hmasawn leh ram ropui tak te chu kut hnathawk a mahni intodelh mi te, mahni siamchhuah ngaisang mi leh an ram atanga thil siamchhuak leh tharchhuak hnem ber te an ni ati a, chutiang bawkin Siaha District ah pawh hei aia nasa hian kut hna thawk a, an tharchhuah te chu ram pawn thlenga thawchhuak thei turin sawrkar a inhawn reng thu leh mahni intodelh ram ni turin kut hnathawka eizawng te a fuih a ni.

Vawiin programme ah hian nilengin Siaha khawpui chung bazar te khar in, District playground ah chawmeh chi hrang hrang phochhuah ani a Thlai thar te leh /sa chi hrang hrang lei tur a awm bakah sangha vulh chi, ei chi leh KVK atanga Thlai chi te lei theih in a awm bawk a ni. District chhunga kut hnathawktu te bakah sawrkar department hrang hrang te kutchhuak lei tur a awm a, bawng ek Lei tha thlengin lei thei in an chhawpchuak ani.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

AFSPA IN MANIPUR

Union Home Ministry chuan Manipur-a dan leh thupek kenkawh kawngah security force-te, a tul anga hma la tura hriattir an ni tih sawiin tharum thawh zawng leh buaina chawh chhuak zawnga chet tumna reng reng, khauh taka chhan let a ni ang, a ti a, mipuite chu muanna vawng him tur leh

thu lengvakte awih zel lova, dan leh thupek kenkawh anih theih nana security force-te thawhpui turin a ngen bawk.

Manipur-a police station 13 huamchhung tih loh state chhung hmun dang zawngah thla hlui atangin thla 6 chhung, Armed Forces (Special) Powers Act, 1958 puan a ni a, he state-a chi leh chi inkara buaina hmet mit tur leh dan leh thupek kengkawh turin Central Armed Police Force company 218 dah a ni.

<><><>

DONER MINISTER

Kum 2014-a Narendra Modi-a kaihhruai sorkar a din hnuah hmar chhak state 8 tana sum ruahman, tum li tih san a ni tawh. He thu hi DoNER Minister, Jyotiraditrya Scindia-a'n Tripura-a nimina thuthar lakhawm tute hnena a sawi a ni a, Tripura-ah hian hmasawna hna thawh dan thlirletna hun hmanpuin

Dr. Manik Saha kaihhruai sorkar hnuai Tripura-in nasa taka hma a sawn theih nan sorkar laipuiin theihtawp a chhuahpui a ni, a ti.

State sorkar hnathawh dan chu fakawm a tih thu sawiin Pu Scindia chuan state-in hma a sawn chhoh zel avangin GSDP pawh cheng vbch sing 9 a tling thei a ni, a ti.

<><><>

PHILIPPINES STORM

Philippines-ah thlipui, Man-Yi thawk thei vangin mi sang tam tak, hmun him lamah sawn chhuah an ni a, thlawhna tam tak tih tawp lailawk a ni bawk.

Man-Yi hian Luzon thliarkar chhak lam a pan avangin Catanduanes leh Camarines Sur province-ah inralring tura hriattirna sang ber dawttu puan a ni a, thlipui hian zanin emaw naktuk zing lamah emaw heng province-te hi a nuai rin a ni.

<><><>